



## PARTII INUIT INATSISARTUNI

**Partii Inuit**

**Randi Broberg**

**Imm.Itt.Ataats. 2014/9**

**27. 1.2014**

**Ullormut oqaluuserisassani immikk. 9: Naalakkersuisumik qinersineq.**  
**(Naalakkersuisut Siulittaasuut)**

Qujanaq.

Siullermik periarfissaq manna iluatsillugu Inuit nunatsinniittut tamaasa qamannga pisumik Partii Inuit sinnerlugit ukiortaami pilluaqqujumavagut. Qanortoq ukioq nutaaq aallartittoq tamatsinnut pissarsiaqarfiulluarili.

Ukioq naalakkersuinikkut pisoqarfiusimaqisoq qaangiussimalerpoq. Sorpassuartigut angusaqarfiusimasoq illuatungaanili aamma kukkuluttorfiusimaqisoq.

Maanna inatsisartut immikkut ittumik qaaqquneqarluta katersuuppugut.

Naalakkersuisumik nutaamik taarsiisariaqalersimaneq pissutigiinnarlugu.

Naalakkersuisumik nutaamik ivertitsinissaq aningaasarpassuarnik inuiaqatigiinnut nalilik aalajangeeqataaffigissallutigu.

Tamaanga killittariaqalersimaneq soorunami tulluusimaarnanngilaq, ilaatigullu allaat kinaanngusaarnartutut oqaatigisariaqarluni.

Maannamut Naalakkersuisuusut ingerlatsinerat sorpassuartigut toqqissisimanarsimanngilaq, inuiaqatigiinnilu tamanna aamma malugilluarneqarpoq toqqissisimanartinneqaranilu.

Taamaattumik asasagut naalakkersuisut. Nunatta siuttui. Nunatta pingarnerpaatut maligassiuisui. Sorpassuartigut aap sulilluaqaasi, kisianni pikkorliuutit ilikkagaqarfiusariaqartut naammalerput.

Inuiaqatigiinni ajornartorsiuterpassuit aaqqitassarpassuillu utaqqipput.

Partii Inuit nalilersuinerput naapertorlugu isumaqarpugut, ullumikkut Nunatsinni naalakkersuinikkut killiffik aamma aallaaveqartoq, naalakkersuisooqatigiit siulorsorneqarnermikkut tunngaviunerusumik qanoq siunnerfeqartinneqarnermikkut naleraqartinneqassanersut nalorngissutaammat.

Ilaatigut naalakkersuisooqatigiinnermik isumaqatigiissut siulleq eqqarsaatigalugu, Siumup iluani pissaaneqarniunneq akimmiffiusimasutut isikkoqarpoq. Tamatumalu malitsigisaanik, tunngaviulluinnartumik naalakkersuinikkut siunnerfilersorerni aaliangiisarnernilu innuttaasut qanumut suleqatigalugit isumasiorlugillu ingerlaniarluni siunnerfeqarnerigaluaq, inuit tamat oqartussaaqataanerannik nukittorsaanissamik isumap qanoq iliallannerinnakkut tununneqarnera siullertut takussutissaavoq, naalakkersuinikkut patajaatsumik ingerlatsisoqanngitsoq.

Tamanna innuttaasunut qinersisartunullu toqqissisimajunnaarsitseqataavoq, imaaliallaannaq qaangerneqarsinnaanngitsoq. Aatsaalli siunissami qaninnermi ungasinnerulaartumilu, naalakkersuinikkut pissusilersuutitigut takutitsilluarnikkut qimakkiartuaarneqarsinnaasoq.

Aalisarnermut, Piniarnermut Nunalerinermullu naalakkersuisuusimasup nutaamik taarserneqartariaqalersimanera, qulaani oqaatigisatsinnut attuumassuteqarpoq.

Tassalu naalakkersuinikkut siunnerfeqarnikkut sumut sammiveqarnissamik nalornissuteqarneq, aamma tassuunakkut ersersinneqarpoq.

Partii Inuit tunngaviusumik isumaqarpoq, pisuussutit suulluunniit sapinngisamik siammarlugit agguataarneqarnerunissaat naalakkersuinikkut anguniarneqartariaqartoq.

Allatut oqaatigalugu Partii Inuit maluginiarparput, naalakkersuisooqatigiit suli tamanna isummerfigisimannngikkaalluunniit – iliuutsimikkummi takutitaat tassaavoq, aalisakkat pisuussutit iluaqtigineqarnissaat eqqarsaatigalugu, suli ingatseriaannartumik pisuussutit iluanaarutissartai inunnut ataasiakkaanut tutsinneqartarnissaat anguniarneqartoq. Tamannalu inuiattut soqutigisarinngikkippuit Partii Inuit qularutiginngilarput.

Inaarutaasumik Partii Inuit pingaartipparput, Nunatta naalakkersorneqarnera eqqarsaatigalugu, piffissami aggersumi patajaassusermik takutitsisoqassasoq.

Naggaterpiatigut kaammattuutigissavarput, naalakkersuinikkut tutsviginassuseq piaarnerpaamik uterteqqinnejassasoq. Naalakkersuisunngortussarlu kaammattussavarput qulaani taaneqartut naapertorlugit suliumaartoq. Taama oqaaseqarluta naalakkersuisutut nutaatut ivertinneqartussaq Finn Karlsen'ip, innersuussutigineqarnera akueralugu taaseqataassaagut.